



Inatsisartuni ilaasortaq
Kristian Jeremiassen, Inuit Ataqtigiit
/Maani

§ 37 naapertorlugu Polar Aassik pillugu apequteqaammut nr. 047-2022- mut akissuteqaat

Asasara Kristian Jeremiassen

Inatsisartut suleriaasianni § 37, imm. 1 naapertorlugu Polar Aassik pillugu Naalakkersuisunut apequteqaateqarputit. Apeqqutitit uannit akineqartussatut innersuunneqarput.

1. Polar Aassik qaqugu qaqinneqassava?

Oqartussaasut maannarpiaq angallat puttallartinneqassanersoq imaluunniit simittorneqassanersoq pillugu sulii aalajagiinnngillat.

2. Sooruna taama siviutingisumik orsussa q mingutitsisinnaasoq peerneqarniarnera siviutingisoq?

Akissut: Maanna pissusiusut tunngavigalugit angallatip uuliaa annertuumik, taamaalillunilu akuersarneqarsinnaanngitsumik inuit inuunerannut avatangiisinullu ulorianartorsiortitsiviunngitsumik peerneqarsinnaanngitsoq uppersarneqarsimasutut oqartussaasunit isumaqarfigineqarpoq. Ilisimatitsissutitut allakkiami ilanngunneqartumi allaaserisat itisiliiffiusut innersuussutigaakka.

3. Suliaq maannakkumut qanoq ingerlava?

Angallatip umiunerani mingutsitsinerup sunniutillu annertuneri peqqutigalugit Namminersorlutik Oqartussat aalajangiipput, Illersornissamut Ministereqarfimmut tunngaviusumik isumaqatigiissut atuutsinneqalissasoq. Akiuiniarnermik Illersornissamut Ministereqarfimmi Illersornissamut Oqartussaasunut (Issittumi Sakkutooqarfik) tunniussinermi mingutsitsinermik akiuiniarnermi suut tamarmik ilaatinneqarput, taakkununngalu ilaatinneqarput sullissinermik aqutsineq, upalungaarsimanermit atortunik atuineq, uppersaatissanik katersuineq uppersaatissallu allat, kiisalu inatsisitigut ikiorsiinerit, tassungalu peqqussusiernerit maalaarutinillu suliaqarnerit ilanngullugit. Tassalu mingutsitsinermik akiuiniarnermi suliat Naalagaaffeqatigiinnermi oqartussaasut akornanni suleqatigiiffineqarput, pingaartumillu Illersornissamut Oqartussaasut aammalu Issittumi Sakkutooqarfik tassunga ilaasoq, aamma Nunalerinermut, Imminut Pilersornermut, Nukissiutinut

Allakkap ullua: 21-02-2022
Suliap normua: 2022 - 4871
Allagaatip ilisarnaataa:
19307564

Postboks 1614
3900 Nuuk
Oqarasuaat: (+299) 34 50 00
Fax: (+299) 34 54 10
E-mail: pan@nanoq.gl
www.naalakkersuisut.gl

Avatangiisinullu Naalakkersuisoqarfik (matuma kingorna oqartussaasut) tassani pineqarput.

Avatangiisinik innarlitsaaliuineq pillugu maalaaruteqartarfiup 27. septembari 2021-mi peqqussut nutaamik suliasanngorlugu Nunalerinermut, Imminut Pilersornermut, Nukissiutitut Avatangiisinullu Naalakkersuisoqarfimmut utertippaa. Maalaaruteqartarfiup utertitsinissamik aalajangiinera oqartussaasunit tusaatissatut tiguneqarpoq.

Tassalu maannarpiaq killiffimmi angallammik puttallartitsisoqassanersoq imaluunniit simittuisoqassanersoq sulii aalajangerneqanngilaq. Maannarpiaq pissusiusut atorlugit Polar Aassik-miit uuliap angallammiiittoq annertuumik, taamaalillunilu akuersarneqarsinnaanngitsumik inuit inuunerannut avatangiisinullu ulorianartorsiortitsiviunngitsumik peerneqarsinnaanngitsoq oqartussaasut naliliipput. Taamaattumik maannamut isumalluutit atugassarititaasut silalu eqqarsaatigalugit pissutsit alapernaarsorneqarput, pissusiviusut pisariaqartitsiffiulerfiini iliuusissanik aallartitsinissaq siunertaralugu.

Issittumi Sakkutooqarfimmit ilisimatitsissutigineqarpoq, 2021-mi maajip naanerani umiuffiusup nalaani immap qaani iluanilu uuliamik malussartoqarsimanngitsoq. Oqartussaasut 20. oktobari 2021-mi allakkamik ilisimatitsissummik Polar Seafood Greenlandimut nassiussivoq. Allakkat ilinnut ilisimatitsissutitut ilanngunneqarpoq.

Inussiarnersumik inuulluaqqusillunga


Múte Bourup Egede

Ilanngussaq 1

1. Aallaqqaasiut

Maalaaruteqartarnermut Ataatsimiititaliaq 9. aggustimi aalajangiimmat, peqqussut 2. juuli 2021-meersoq (peqqussummut tapiliussaq) peqqussummut siullermut 20. aprili 2021-meersumut taarsiullugu atuutilissasoq, aammalu Maalaaruteqartarnermut Ataatsimiititaliaq kingusinnerusukkut 27. septembari 2021-mi peqqussutip 2. juuli 2021-meersup nutaamik suliassanngorlugu utertinneqarnissaanik aalajangiimmat, maannarpiaq PSG-mut imaluunniit BM-imut peqqussuteqartoqanngilaq.

Taamaattumik tamanna tunngavigalugu oqartussaasut tamatuma kingunerisaanik suliameqarnissaa pillugu nutaamik aalajangiipput.

Tamatumunnga atatillugu oqartussaasunit allagaatit, PSG-p allakkatigut 13. aggusti 2021-meersutigut oqartussaasunut nassiussaat, kiisalu oqartussaasut alapernaarsuinerminni killiffii eqqarsaatigineqarput.

PSG-miit allagaatit peqqussuteqarnerup naammassineqarnissaanut tunngatillugu avataaniit naliliisitsinernik innersuussutinillu teknikkimut tunngassuteqartunik, kiisalu tamatumunnga atatillugu angallatip qaqinneqarnissaanut/uuliap simittorneqarnissaanut pilersaarutigineqartunik imaqqarput.

Tamatuma saniatigut allagaatini allassimavoq, PSG aamma BM tamatumunnga ilassutitut namminneerlutik angallatip qanoq issusianut, uuliaarluertoqarsinnaaneranut aammalu avatangiisinut kingunerisassanut tunngatillugu teknikkikkut assigiinngitsunik naliliisitsisimasut. Tassalu naliliinerit taakku misissuinerik naliliinernillu, 20. aprili 2021-mi peqqussuteqarneq, aammalu peqqussummut tapiliussaq 2. juuli 2021-meersoq, PSG-miillu ilisimaneqartoq tunngavigineqarput.

Pissusiviusunik ataatsimut naliliineq aamma misissuinerit suliameqarnissaneqartut, tassungalu ilanngullugit paasissutissat PSG-p pissarsiai tunngavigalugit oqartussaasut naliliipput, inatsisinik unioqqutitsilluni uuliamik kuutsitsisoqaqqinnissaanut, taamaalillunilu imaani avatangiisinut inatsimmut ilaasumik mingutsitsisoqaqqinnissaanut suli ulorianartorsiortoqartoq. Taamaattumik aamma oqartussaasuniit peqqussut 2. juuli 2021-meersoq utertinneqarsimanngitsuuppat PSG-p qanoq iliorluni naammassinninnissaanut pilersaarut nassiunneqartoq naliliiffineqarpoq.

2. Immami avatangiisinut inatsimmut ilaasumut mingutsitsisinnaaneq suli ulorianaateqarpoq

Aamma peqqussummut tapiliussami, 2. juuli 2021-meersumi (nutaamik suliarineqaqqittusanngorluni utertinneqartumi) allamassisutut, POLAR AASSIK-p kivinermini dieseloliamik (AGO) annertuumik, uuliamik tarnutissamik annertungaatsiartut aammalu hydraulikoliamik useqarnera

oqartussaasut pequssuteqarnerminni pingaartippaat. Kivisimatsiarnerani uuliamik immami malussartoqarpoq, aammalu naliliisoqarpoq, suli immami avatangiisinut ajoqutaasumik aniasoqaqqinnissaanut ulorianartorsiortoqartoq. Angallat sinerissamut qanittumut aammalu sumiiffimmi pinngortitami malussajatorujussuarmi, najukkamilu aalisarnermik pingaarnertut inuussutissarsiteqarfiusumut kivivoq.

Oqartussaasut naliliipput, inatsisinik unioqqutitsilluni uuliamik kuutsitsisoqaqqinnissaanut, taamaalillunilu imaani avatangiisinut inatsimmut ilaasumik mingutsitsisoqaqqinnissaanut suli ulorianartorsiortoqartoq, aammalu paasissutissat PSG-p pissarsiaa taamatut naliliinermik allannguinnissamut tunngavissinngitsut, tamannalu imm. 2.1-imi aamma 2.2-mi itisiliiffiqineqarpoq.

2.1 Angallammi uuliap annertussusia aamma uuliamik mingutsitseqqinnissamut ulorianartorsiorneq:

Nalunaarusiami, Survey Association-imit (SA) suliarineqartumi, matuma kinguliani SA-p nalunaarusiaanik taagorneqartumi, 12. aggusti 2021-meersumi (ilannugsaq C) allassimavoq, *“angallat immap naqqanut tunnermini ajoqusersimassasoq ilimagineqartariaqartoq”* (qupp. 4), aammalu angallatip kivinnginnermini ikuallannerani *“angallatip sannaasa sisaasut qajannarsisimanissaat naatsorsuutigineqartariaqartoq. Nalinginnaasumik oqaatigalugu sisak ussiillisimassaaq”* (qupp. 4). Aamma SA-p nalunaarusiaani allassimavoq, 25. maaji 2021-mi ROV atorlugu misissuinermi paasineqartoq, ikkussukat annertuumik ajoqusersimasut ilaatigullu nakkaassimallutik (qupp. 7). Taakkulu naliliinerit, oqartussaasut angallatip umiunermi kingorna qanoq issusianik naliligaasa assigaat.

Aamma SA-p nalunaarusiaani allassimavoq, angallatinit kivisimasunit allanit misilittakkat takutikkaat, orsussamut tankit ulikkaarluarsimannngitsut umiunermi naqitsinerup annertunera peqqutigalugu illumut qaartartut, tamannalu tankit taamaattut isaneritik kinguneqartarsimasinnaasoq.

Uuliamut tanki ataaseq amerlanerusulluunniit taamatut pisimasinnaasut, taamaattumillu uuliamik seerisoqarsimasinnaasoq (ataasiartumik ingerlaavartumilluunniit) oqartussaasut isumaqataapput, kisiannili taamatut pisoqarnerani uulia immap qaavanut anngussimasinnaanersoq, imaluunniit angallatip iluaniiginnarsimasinnaanersoq ilisimaneqanngilaq, qanorluunniilli pisoqarsimagaluarpat uulia qanoq aniassanersoq imaluunniit uulia angallatip iluaniiginnartoq qanoq annertutiginersoq aalajangissallugu ajornakusoorpoq. SA-p nalunaarusiaani qupp. 17 naapertorlugu Survey Association isumaqataarpassippoq, tassanilu allassimavoq, angallatip timitaani uuliamik uninngasoaqarnissaa naatsorsuutigineqartariaqartoq.

Survey Association nammineerluni naliliivoq, *“Tankit amerlanersaanmut periarfissaasinnaasoq alla ilimanarnerusorlu tassaavoq – takusimasat tunngavigalugit – angallatit immap naqqanut tunnerini tankit amerlanersaasa qanorluunniit annertutigisumik angallatip umiunerani tankini sinneruttunik*

imaqaraluarunik tankit ajoqusertannginnerat” (qupp. 5). Tassalu taamatut naliliineq aamma oqartussaasut peqqussuteqarnerminni tunngavigaat.

Angallatip sumiiffimmi inissisimaffianut tunngatillugu SA-p nalunaarusiaani allassimavoq, *“Umiusup immap naqqanut naqerujussuarsimaneqarnera aammalu sisaap sanngiillisimanera uuliap piiarnissaanut eqqarsaatersuutitut ilaatinneqassapput*” (qupp. 5), aammalu GEUS-imit paasissutissat tunngavigalugit eqqarsaatigineqarsinnaavoq, *“SILT”*-ip qaleriiusup issussusia angallammit portunerummat (qupp. 5), kiisalu ilanngussaq C2, DHI-miit immap naqqani pissutsit pillugit allakkiaa innersuussutigalugu angallatip suli 25. maaji 2021-mi ROV atorlugu misissuinerminni paasineqartutut inissisimanissaa naatsorsuutigineqartariaqarmat. Tamatumunnga atatillugu allassimavoq, angallat ukiumut sermimit sisujartortumiit kinnernik 1-2 cm-inik qallerneqartarnissaa naatsorsuutigineqartoq (qupp. 11 aamma qupp. 17). Tassalu tunngaviusumik angallatip uninngaannarnissaa tunngavigineqartariaqassasoq isumaqartoqarpoq.

Angallatip sumiiffimmi inissisimaneranut tunngatillugu SA-p nalunaarusiaani allassimavoq (qupp. 17), angallat aalisariummiit qalorsuarnit pisarineqarsinnaasoq/naatiffigineqarsinnaasoq, tamannalu qaarajunnersanit, angallatip timitaani mattusimasunit uuliamik imalittut naatsorsuutigineqartunit uuliamik aniasoqalerneranik kinguneqarsinnaassavoq. Oqartussaasut taamatut naliliinermut isumaqataapput, kisiannili tamatuma saniatigut aamma oqartussaasunit naliliiffigineqarpoq, pissutsit taamaannerat angallatip timitaata ajoquseqqinnera imaluunniit aalanera imminermini angallammiit uuliamik aniasoqaqqinneranik nassataqarsinnaasoq. SA-p nalunaarusiaani allassimavoq, SA-p tamanna tunngavigalugu puttaqummik nalunaaqutsiussamik ikkussisoqarnissaa innersuussutigigaa (qupp. 17).

Angallatip qanoq issusia eqqarsaatigalugu SA-p nalunaarusiaani allassimavoq, aamma naqitsinerup annertunera peqqutigalugu uuliamut tankit silaannaartarfii (naqitsinermut/millugussinermut ventilimik taaneqartartut) ajoqusersimasinnaasut (qupp. 6). Ilanngussaq C4-mi, suliffeqarfiup Pres Vac-ip ventilil artorsarsinnaanerinit misileraaneranut tunngasumi taamatut isummerneq taparserneqarpoq. Tamatumunnga atatillugu allassimasut malillugit skibsingeniøri Jens Kristensen (ilanngussaq C5), Dansk Hydraulisk Institut (DHI) (ilanngussaq C6) aamma marinesurveyor skibsingeniørilu Hans Henrik Krogh SA-meersoq (ilanngussaq C7) ventili silaannaarfik taamaattoq aqutigalugu uuliamik seerisoqarsinnaanerata ilimanaateqarnera/ulorianartorsioertitsisinaanera pillugu oqaaseqaateqarput. SA-miit inerniliissutigineqarpoq, tamanna tunngavigalugu uuliamut tankit pingaarnertut maannarpiaq uuliamik imaareersimanissaasa naatsorsuutigineqarnissaa ilimanaateqarnerusoq (qupp. 6), aammalu ITOPF-ip nalunaarusiaani tamanna ilimagineqarpoq (ilanngussaq A).

Kisiannili skibsingeniøri Jens Kristensen uulia angallammiittoq pillugu allakkiamini (ilanngussaq C5) allappoq, *“Ammalloorissut ilusiminnik iluseqaannarsimanissaat, taamaattumillu innarlarsimappata tankit imermik immiinnarsimanissaat nalorninarpoq, imaluunniit annertuumik innarlarsimappata ammanerinut suli milinngatitsisinaanersut, taamaalillutillu*

uuliap nakkutigisaanngitsumik ilaannaasumilluunniit anianissaanut akimmisitsinersut nalorninarluni”, aamma “Matuma siuliani allassimasorpiaat [ventilit qanoq issusii/ammaneri pillugit nalornissutit] peqqutigalugit aniasoqarnissaanut Poiseuille-p periaasiata atornissaa isumaqartussatut isumaqarfiginngilarput, Tassani tukimut annertussuserpiaq, kisiannili aamma uuliap naqitsinermiit naqinneqarneri avatangiisillu assigiissinnaaneri ilisimanginnatsigit”.

Tassunga ilassutitut skibsingeniøri Jens Kristensen allappoq, aamma tamatumunnga atatillugu naatsorsuutigineqartariaqartoq, *“tankit iluisa qulaata tungaanni qaarajunnerit peqqutigalugit uuliap ilaa angallatip timitaaniiginnartussaasut”*. Taamaattumik eqikkarlugu skibsingeniøri Jens Kristensen inerniliivoq, *“Matuma siuliani allassimasut peqqutigalugit isumaqarpugut, Polar Aassik-p iluani suli uuliamik annertungaatsiartumik peqartoq”*.

Uuliamik seerisoqarnera pillugu DHI-p allakkiaani (ilanngussaq C6) allassimavoq, allakkiami naatsorsukkani ventilit ammasimanissaat naatsorsuutigineqartoq (qupp. 4). Taamaattumik oqartussaasut naliliipput, tamanna annertuumik nalornisitsisussaangitsoq, paasissutissat pissarsiarineqartut tunngavigalugit – maannamut – tamanna pillugu qularnaatsumik inerniliisoqarsinnaanngimmat. Naliliinerup nalorninarloqartinneqarnera aamma allakkiami inerniliinermi takuneqarsinnaavoq, tassanilu allassimavoq, *“The conclusion are based on the available knowledge and therefore the estimates are relatively uncertain”*.

Aamma marinesurveyor-ip skibsingeniørillu Hans Henrik Krogh-p (SA-meersup) allakkiaani (ilanngussaq C7) allassimavoq, ventilit qanoq issusii pillugit nalorninaatsumik oqartoqarsinnaanngitsoq, taamaattumillu maannarpiaq ventilit naqinneqarneri/millugunneqarneri aqutigalugit uuliamik aniasoqareersimanersoq – tamannalu pisimassappat qanoq annertutigisumik aniasoqarsimanersoq – qularnaatsumik oqartoqarsinnaanngitsoq. Tassalu allakkiami allassimavoq, *“It is unclear how much oil is left in the wreck.”* (qupp. 2), aamma *“If the pressure could not equalize during the sinking some of the oil tanks may have imploded. This is not confirmed”* (Qupp. 3). Tamatuma saniatigut allakkiaq (ilanngussaq C7) tunngavigalugu, angallammi teknikkimut tunngasunik naatsorsuinerit kisiisa tunngavigalugit uulia qanoq annertutigisoq umiarsuup timitaani sinnerunnersoq naatsorsorneqarsinnaanngilaq. Tassalu allassimavoq, *“The theoretical oil flow cannot be calculated from Poiseuille’s formula as the formula does not account for the counter flow of seawater in the 2” airpipe.”* (side 5) og *“Even if the arctic gas has discharged itself by gravity some oil pockets may still be inside the hull.”* (qupp. 5).

ITPOF-ip nalunaarusiaani (ilanngussaq A) taaneqarpoq, umiarsuup kivinnginnerani uulia ikuallassimasinnaasoq, imaluunniit immami avatangiisinut kooreersimasinnaasoq (tankinit aserorsimasunit imaluunniit silaannaarfinnut ruujorit aqutigalugit). Matuma siuliani allassimasut aammalu paasissutissat siusinnerusukkut pissarsiarineqartut tunngavigalugit oqartussaasut ataatsimut naliliipput, taamatut isummersuuteqarnerit takusanik qulakkeerinissamut,

imaluunniit umiarsuarmi teknikkimut tunngasunut qularnaatsumik uppersaasiornissamat naammattumik tapertaasinnaangitsut, taamaattumillu taamatut isummersuuteqarnerit qanorluunniit pisoqaraluarpat annertuumik nalorninartoqartitsiffiusussaasut.

Uulia – ITOPF-ip nalunaarusiaani ilanngussaq A-miittumi allassimasutut (qupp. 8-10) – maannamut ilisimaneqartumit annertunerusoq takuneqarani seerisimassappat/kuussimassappat, matuma siuliani allassimasut tunngavigalugit oqartussaasut naliliipput, mianersornissamik tunngaveqarluni sulii uuliat annersaata angallammiissimanissaa – tankini imaluunniit umiarsuup timitaani mattusimalluni – tunngavigineqassasoq.

Naliliinermi matumani oqartussaasunit isiginiarneqarpoq, 2021-mi juunip aallartinneraniilli umiuffiup nalaani immat qaani iluaniluunniit uuliamik malussartoqarsimanngimmat, tamannalu angallatip uuliamik imaareersimaneranik naatsorsuutigisaqarnermut tapertaasinnaavoq. Kisiannili aamma maannarpiq angallammiit takuneqartunit annertunerusumik uuliamik kuuttoqarsimannginnera/seerisoqarsimannginnera tamatumunnga tunngaviusinnaavoq – pingaartumik matuma siuliani taaneqartutut kuussimasinnaasut/seerisimasinnaasut annertussusii qulakkeerlugit oqaatigineqarsinnaanngimmata.

Tassalu maannarpiq pissutsit allanngoranninnerat, aammalu maannarpiq uuliamik avatangiisinut seerisoqannnginnera/kuuttoqannnginnera takuneqarsinnaagaluarpoq, tamatuma allanngunnginnissaa qulakkii-villugu oqaatigineqarsinnaanngilaq. Taamaattumik oqartussaasut naliliipput, sulii uuliamik kuuttoqaqinnissaanut/uuliamik mingutsitsisoqarnissaanut ulorianartorsiorpoq. Oqartussaasut taamatut naliliinermi pingaartippaat, immami avatangiisinut inatsimmi § 3 naapertorlugi oqartussaasut inatsit naapertorlugi aqutsinermi mianersornissamik tunngaveqarlutik sulisinnaammata.

2.2 Umiuneq sinerissamat qanittumi aamma pinngortitami malussajatorujussuarmi, najukkamilu aalisartut pingaarnertut inuussutissarsiorfigisaanni, aammalu immami avatangiisinut annertuumik ulorianartorsiorfitsiviusumi pivoq:

Peqqussummut tapiliussami 2. juuli 2021-meersumi (nutaamik suliarisassanngorlugi utertinneqartumi) allassimasutut, oqartussaasut peqqussuteqarnermini angallatip sinerissamat qanittumi pinngortitamilu malussajatorujussuarmi pinera pingaartippaat.

Ataatsimut isigalugu tamatumunnga atatillugu DCE-p avatangiisinik naliliinera nutartigaq, 2. juuni 2021-meersoq innersuussutigineqarpoq. Tassani eqikkarlugi erseqqissaatigineqarpoq, nalunaarummi piffissami sivilisnerusumi kilisaammit POLAR AASSIK-mit, 300 meterinik itissusilimmiittumit sivilisnerusumik ingerlaavartumillu uuliamik seerisoqarnerani avatangiisit annertunerusumik ulorianartorsiorsinnaasut. Imaariartornera qupineeqqatigut pisimagaluarpat imaluunniit tankip imaa ataatsikkut kuussimagaluarpat tamanna atuuttussaavoq.

Nalunaarusiami allassimavoq, uuliap avatangiisinut sunniutissaannut tunngavissat amerlasuut apeqqutaasinnaasut, soorlu uulia sumut tissukarsimasinnaava (sarfaq anorilu aalajangiisuullutik) aammalu ukiup qanoq ilinerani tamanna piva (tassunga sikoqarnera ilaatinneqarluni). Sumiiffiit sinerissamut qanittut ataatsimut isigalugit imaani ammaannartumi pisoqarneranut naleqqiullutik uuliaarluertoqarnissaanut sunnertiasorujussuusarput. Pingaartumik upernaakkut aasakkullu timmissat, kiisalu sinerissami immami ikkattumi aalisakkat piaraat aalisakkallu suffisut aniasoqarnerani sunnertissinnaanerit annertunerulluni ulorianartorsiornerusarput.

PSG-p saqqummiussamini 21. juunimeersumi DCE-p nalunaarusiaa oqaaseqarfigaa, taannalu oqartussaasut 2. juuli 2021-mi ilassutaasumik peqqussuteqarnerminni (nutaamik suliassanngorlugu utertinneqartumi) isiginiarpaat/oqaaseqarfigaat. Tamatuma saniatigut DCE-p sulianut tunngatillugu allakkiamini 1. juuli 2021-meersumi PGS-ip oqaaseqaatai oqaaseqarfigai (oqartussaasut oqaaseqaataanni/akissutitut allakkiaanni, 2. juuli 2021-meersumi ilanngussaq 13).

Aamma ITOPF-ip nalunaarusiaani umiunerup immami avatangiisini sunnertialluinnartuni pisimanera tunngavigineqarpoq (imm. 4.2.1, qupp. 11), aammalu ITOPF-ip nalunaarusiaani DCE-p nalunaarusiaata avatangiisinut naliliinerni, uuliap avatangiisinut ajoqusiinnaaneranut tunngatillugu DCE-mit suliarineqartuni suliat pitsaassusiinut isummernerup allanngortinnissaanut tunngavissiiingitsutut naliliiffigineqarnera tunngavigineqarluni.

ITOPF-ip nalunaarusiaani allassimavoq, ITOPF-ip POLAR AASSIK-mit uuliamik aniasoqassagaluarpat uuliap aqutiginnaasaanut siaruarfigisinnaasaanullu suliffeqarfik RPS (Oil Spill Modelling, ilanngussaq B) najoqqutassiortissimagaa/piviusuusaartitsinermi takussutissiortissimagaa. Tamatumunnga atatillugu najoqqutassiani/piviusuusaartitsinerni taakkunani taamaallaat ukiup qanoq ilinerani aniasoqarsinnaaneranut piffissaliussani assigiinngissutsit annikitsuinnaanerit takutinneqarpoq (4.2.2, qupp. 13).

ITOPF naliliivoq, immami avatangiisinut uuliamik kuuttoqassagaluarpat avatangiisit annertuumik sunnuteqarfiginerlunneqarnissaannut ulorianartorsiorneq annikitsuinnaasoq (imm. 4.2.2, qupp. 14). Najoqqutassiat/piviusuusaartitsinerit suliarineqartut aniasoqarnerata avatangiisinut ajoqutaasinnaanerinik naliliinermut, DCE-mit suliarineqartumut sanilliukkaanni, taamatut inerniliinermut suna tunngavigineqarsimanersoq ersarissumik takuneqarsinnaanngilaq. Tassalu ilanngussaq B naapertorlugu – pingaartumik tassanngaannartumik aniasoqarnerani – aniasoqarnera/kuuttoqarnera katersuuttunik ajoqutaasinnaasunik, killissarititatus akuerisaasut sinnerlugit annertussuseqartunik aniasoqassanngitsoq oqartoqarsinnaanngilaq, assersuutigalugu tak. tabeli 12, qupp. 20. Tamatumunnga atatillugu aamma SA-p nalunaarusiaa innersuussutigineqarpoq, tassanilu POLAR AASSIK-p uuliap erngerluni peerneranik kinguneqartumik qaartinneqarnerani maanna pissusiusunut naleqqiullugu ajoqusernerit annertuumik ajorseriarsinnaasut inerniliissutigineqarpoq.

ITOPF-ip sinerissamut sunniisinnanermut naliliinera malillugu uulia annikitsuunnaq sinerissamut tipisussaavoq, aammalu tamatuma avatangiisinut sunniuteqarnerlunnissaa ilimanaateqanngilaq (imm. 4.2.2, qupp. 14). Aamma inerniliinermi tassani najoqqutassiat/piviusuusaartitat suliarineqartut DCE-p avatangiisit pillugit naliliineranut sanilliunneqarneri eqqarsaatigalugit tunngavissamik sukumiinerusumik nassaartoqanngilaq. Tassalu ilanngussaq B tunngavigalugu isummertoqarsinnaavoq, najoqqutassiani/piviusuusaartitsineri tamani sinerissat sunnerneqartussaassasut, assersuutigalugu tak. tabeli 11 aamma 15.

Uuliap ingerlaarfissaanut siaruarfissaanullu najoqqutassiat/piviusuusaartitsinerit suliarineqartut tunngavigineqaraluartut, pisut ilaanni ingerlaarfiit siaruarfillu piviusuusaartitanit, DCE-mit suliarineqartunit annertunerusumik annikinnerusumilluunniit allaanerunerusinnaammata, oqartussaasut naliliipput, tamanna imminermi uuliamik immami avatangiisinut aniasoqaqqinnerani/kuuttoqaqqinnerani avatangiisit sunnerneqannginnissaannut imaluunniit killeqartorujussuarmik sunnerneqarnissaannut uppersaataasinnaangitsoq. Pingaartumik mianersornissaq isiginiarneqassappat.

Tamatununga atatillugu aamma oqartussaasut pingaartippaat, mingutsitsisinnaanermut tunngatillugu immami avatangiisinut inatsimmut oqaaseqaatini allassimasoqarmat, mingutsitsisinnaanermut sukumiisumik nalunaarsuinerit tunngavigineqartillugit tamanna avatangiisini suliat pillugit naliliinerungimmat, kisiannili matumani pissutsit immami avatangiisinut inatsimmut ilaatinneqarlutik “mingutsitsinissamut ulorianartorsiornermik” kinguneqarsinnaanerini inatsisitigut naliliinerinnaalluni.

2.3 PSG-p peqqussummik naamassinninnissaa/Akiuiniarnermi iliuusissai

2.4 Uuliap angallammiit peerneqarnissaa

SA-p nalunaarusiaa avataaniillu isummersuutit, nalunaarusiornermut tunngavigineqartut tunngavigalugit oqartussaasut isumaqarput, maanna pissutsit atuuttut atorlugit POLAR AASSIK-mit uulia inuit inuunerannut avatangiisinullu annertuumik– taamaalillunilu akuersarneqarsinnaangitsumik – ulorianartorsioritsiviunngitsumik peerneqarsinnaangitsoq uppersarneqartoq. Tassani nalunaarusiami qupp. 7-8 innersuunneqarput.

2.5 Angallatip imartamiit peerneqarnissaa

SA-p nalunaarusiaani allassimavoq, uuliap atortullu avatangiisinut navianaatillit inissivissamut akuerisamut tunniunneqarnissaat siunertaralugu angallat puttallartillugu imartamiit peerneqarsinnaasooq, aammalu niunerneq eqqarsaatigalugu tamanna ajornangitsoq. Nalunaarusiami qupp. 8-12 innersuussutigineqarput.

Aamma SA-p nalunaarusiaani allassimavoq, avataaniit ingerlatseqatigiiffiit avataaneersut marluk angallatinik taamatut annertussusilinnik/suussusilinnik puttallartitsisarnermik misilittagaqartunik.

Ingerlatseqatigiiffik SMIT, tigutsissut atorlugu angallatinik puttallartitsisinnaasoq siornatigut assinganik suliaqarsimasoq pillugu uppenarsaatit nassiunneqarput. Akigititassat 10 mio. EUR-it inorlugit annertussuseqartussaannigitsut oqaatigineqarpoq. Kisiannili suliassaq 31. oktobari 2021 nallertinnagu suliarineqarsinnaanngilaq, tassalu suliassaq siusinnerpaamik 2022-mi upernaakkut/aasakkut suliarineqarsinnaalluni. Suliffeqarfiup JD Contractors-ip aaqqiissutissat pillugit oqaaseqaataani (ilanngussaq C 20) allassimavoq, taamatut suliaqarnermi angallatip puttallartinneqarnerani uuliamik kuuttoqarsinnaasoq, aammattaaq immikkoortoq tulleq takuuk.

SA-p nalunaarusiaani (qupp. 9-12) allassimasutut ingerlatseqatigiiffik JA Shipping (ilanngussaq C14-C18) naliliivoq, angallat kivitsissut atorlugu puttallartinneqarsinnaasoq. Tamannali pisimassappat angallat ikuallannermini aammalu immap naqqanut tunnermini annertuumik ajoqusersimassanngilaq. Maanna pissusiviusut, aammattaaq tak. imm. 2.1, tunngavigalugit tamanna nalorninartoqartinneqartutut isummerfigineqartariaqarpoq. SA-p nalunaarusiaani aamma allassimavoq, tamanna pissutigalugu kivitsinermi angallammiit uuliamik kuutsitsisoqannginnissaa qulakkeerneqarsinnaanngitsoq – tankiniit imaluunniit angallatip timitaata qunnertaaniit, angallatilluunniit kivinneqarnerani napineraniit uuliap aniasinnaanera eqqarsaatigalugu. Tamanna tunngavigalugu SA inerniliivoq, immami avatangiisinut uuliamik kuutsitsisoqannginnissaa navianaateqartoq. Suliassamut tassunga akiusoq 55 mio. koruuninut missiliorneqarpoq, tassunga momsi ilanngunnagu. Suliassaq taanna aamma 2022-mi upernaq/aasaq nallertinnagu suliarineqarsinnaanngilaq.

2.6 Uuliamik aniasoqannginnissaanut/mingutsitsisoqannginnissaanut qularnaarinerit suliniutissallu allat

2.6.1 Angallatip simittorneqarnissaa

SA-p nalunaarusiaani allassimavoq, suliffeqarfik Østermark Grouting (ilanngussaq C19) naliliisoq, angallatip betonimik simittornissaa immami avatangiisinut ulorianartorsiortitseqqinnani suliarineqarsinnaasoq. Matumani teknikki, aammattaaq anorisaatinut toqqavinnut atorneqartartoq ilisimaneqareersoq pineqarpoq.

Suleriaaseq taanna piffissami sivilisungaatsiartumi (ukiut 100-t) atasinnaagaluartoq, aammalu ukiut ingerlanerini kinnernik qalleqqinneqartussaagaluartoq, kiisalu kiveqqinnissaa naatsorsuutigineqaraluartoq ataavartumik aaqqiissutissaanngilaq, pissusialu tunngavigalugu ingerlaavartumik takuniarneqartarnissaa/alapernaarsorneqarnissaa pisariaqarluni. Suleriaatsip taassuma 53 mio. koruunit missaannik akeqarnissaa naatsorsuutigineqarpoq, momsi ilanngunnagu, suliassarlu taanna aamma siusinnerpaamik 2022-mi

upernaakkut/aasakkut suliarineqarsinnaassaaq, tassanilu ROV atorlugu misissueqinnissaq/piareersarnissaq pisariaqarpoq.

2.6.2 Angallatip qaartinneqarnissaa

SA-p nalunaarusiaa avataaniillu isummersuutit, nalunaarusiornermut tunngavigineqartut tunngavigalugit oqartussaasut isumaqarput, maanna pissutsit atuuttut atorlugit POLAR AASSIK-mit uulia inuit inuunerannut avatangiisinullu annertuumik – taamaalillunilu akuersaarneqarsinnaanngitsumik – ulorianartorsiortitsiviunngitsumik qaartitsinikkut peerneqarsinnaanngitsoq uppernarsarneqartoq. Tassani nalunaarusiami qupp. 15 innersuunneqarpoq.

2.6.3 Seerinernik/kuuttunik alapernaarsuineq

SA-p nalunaarusiaani (qupp. 16) aamma ITOPF-ip nalunaarusiaani (imm. 4.3.3, qupp. 21) inassutigineqarpoq, suliassatut qinigassatut allatut, tak. matuma siuliani allassimasut, POLAR AASSIK-mit uuliamik (uuliamut tankinit imaluunniit uuliamik angallatip timitaani mattusimasumik) aniasoqalersinnaaneranut alapernaarsuummik ikkussisoqassasoq.

INUIT ATAQATIGIIT

Inatsisartuni



11. Februar 2022

Inatsisartut Suleriaasianni § 37 imm. 1 naapertorlugu Naalakkersuisunut apequt imaattoq matumuuna saqqummiuppara.

Naalakkersuisunut apequt:

1. Polar Aassik qaqugu qaqqinneqassava?
2. Sooruna taama siviutingisumik orussaq mingutitsinnaasoq peerneqarniarnera siviutingisoq?
3. Suliaq maannakkumut qanoq ingerlava?

(Inatsisartuni ilaasortaq Kristian Jeremiassen, Inuit Ataqatigiit)

Tungavilersuut:

Allaangilaq puijorneqarniaannartoq Qasigiannugit eqqaaniittoq Polar Aassik kivinikoq, piffiup eqqaa uumasooqarpoq raajat, qalerallit, saarullit allarpasuillu.

Akuerisinnaangilara taama siviutingisumik suliap ingerlanneqarnera iliuseqartoqaranilu. Misissungassaangilaq nalunngereerparput Polar Aassik immap naqqaniittoq qaqqinneqartariaqartorlu.

Angallat qaqqinneqartariaqarpoq siviullaaleqaaq, akisussaaffeqanngippallaarpungut pinngortitap uumasullu paarinissaanut nalunngikkalarlugu Polar Aassik immap naqqaniittoq.

Kissaatigaara apeqqutit ullut qaangiutsinnagit akineqarnissaat.